

Actonan protocolario riba dia di Betico



ORANJESTAD (AAN): Nubia tabata tapa solo de vez en cuando, ora cu Diabierna mainta e Programa Protocolario riba Dia di Betico a cuminsa riba Plaza Libertador Betico Croes.

Di mainta tabatin musica di Orkesta Harmonica Arubano, y pa 8:45'or e dignatarionan a cuminsa yega. Pa 9'or, Gobernador mr. Olindo Koolman a yega.

Asina a cuminsa cu e apertura oficial, cu Himno di Aruba interpreta pa Grupo Bereya di Maybeline Arends-Croes.

A sigui cu un ofrenda floral, unda Vice-Prome Ministro drs. Marisol Tromp hunto cu

Secretario di Consejo di Ministronan mr. Peter Davidse a pone un krans na nomber di Gobierno.

Pa Parlamento di Aruba, tabata Vice-Presidente Marlon Werleman y Griffier Interino Lic. Jossy Semeleer cu a pone krans.

Pa famia directo di Betico Croes, esnan cu a pone krans ta Gilberto François Junior, y Glendeline Croes. Tambe dos representante di Fundacion Betico Croes a pone krans.

Despues a sigui cu discurso di Vice-Prome Ministro drs. Marisol Tromp, como tambe Glenbert Croes representando famia di Betico.

